

NË EMËR TË POPULLIT

GJYKATA THEMELORE GJAKOVË - DEGA RAHOVEC/Departamenti i Përgjithshëm/Divizioni Penal, gjyqtari i vetëm gjykues Mizahir Shabani, me sekretaren juridike Shemsije Shehu, në çështjen penale kundër të akuzuarit B. F. nga fshati B., Komuna e Rahovecit, për shkak të veprës penale vjedhja e shërbimeve komunale nga neni 320 të KPRK-së, i akuzuar sipas aktakuzës së Prokurorisë Themelore në Gjakovë/Departamenti i Përgjithshëm PP.nr.778/2016 të datës 28.10.2016, pas mbajtjes së shqyrtimit fillestar, në prezencën e përfaqësuesit të akuzës Prokurori i Shtetit Ismet Tofaj, dhe të akuzuarit, me datë 30.08.2018, mori dhe publikisht shpalli këtë:

A K T G J Y K I M

I akuzuari,

B. F., nga i ati H. dhe e ëma A., e gjinisë Q., i lindur me dt...., në fshatin B., Komuna e Rahovecit, ku edhe tani jeton, me numër personal ..., i papunësuar, ka të kryer shkollën e mesme, i martuar, i ati i tre (3) fëmijëve, i gjendjes së dobët ekonomike, shqiptar, shtetas i Republikës së Kosovës, më parë i padënuar.

ËSHTË FAJTOR

Sepse:

Me datë të pavërtetuar e gjerë me dt.03.07.2015, në shtëpinë e tij, në fshatin B., Komuna e Rahovecit, me qëllim që vetit t'i sjellë përfitim pasuror të kundërligjshëm, në mënyrë të paautorizuar ka shfrytëzuar energjinë elektrike në atë mënyrë që jashtë njehsorit elektrik me nr.04673917, përmes kabllor 3x2.5 ka bërë lidhjen direkt në rrjetin elektrik, me çka ka penguar kështu regjistrimin e energjisë së shpenzuar elektrike, gjendje kjo e konstatuar nga personat e autorizuar të KEDS – Distriktit në Gjakovë me rastin e kryerjes së kontrolles, me ç'rast të dëmtuarës KEDS – Divizioni i Rrjetit – Distrikti në Gjakovë i ka shkaktuar dëm material në shumë prej 215,63 Euro.

Me këtë ka kryer veprën penale vjedhja e shërbimeve komunale nga neni 320 të KPRK-së.

Andaj, gjykata konform nenit 4, 6, 7, 17, 41, 42, 49 par.1 pika 1.1, 50, 51, 52 dhe 73 të KPRK-së, si dhe nenit 365 të Kodit të Procedurës Penale, të njëjtit i shqipton:

DËNIMIN ME KUSHT

Gjykon me dënim me gjobë në shumën prej dyqind (200) euro dhe dënim me burgim në kohëzgjatje prej nëntëdhjetë (90) ditëve, të cilat dënime nuk do të ekzekutohen, nëse i akuzuari brenda kohës së verifikimit në afat prej një (1) viti, nga plotfuqishmëria e aktgjykimit, nuk kryen ndonjë vepër tjetër penale.

E dëmtuara KEDS – Distrikti në Gjakovë, udhëzohet që kërkesën pasurore juridike ta realizojë në kontest civil.

Detyrohet i akuzuari që të paguajë shpenzimet e paushallit gjyqësor në shumë prej tridhjetë (30) euro, si dhe për fondin e kompensimit të viktimave të krimit shumë prej tridhjetë (30) euro e të gjitha këto në afat prej 15 ditëve nga dita e plotfuqishmërisë së këtij aktgjykimi.

A r s y e t i m

Prokuroria Themelore në Gjakovë/Departamenti i Përgjithshëm, në këtë gjykatë ka paraqitur aktakuzën PP.nr.778/2016 të datës 28.10.2016, kundër të akuzuarit B. F. nga fshati B., Komuna e Rahovecit, për shkak të veprës penale vjedhja e shërbimeve komunale nga neni 320 të KPRK-së.

Gjykata ka caktuar seancën e shqyrtimit fillestar me datën 30.08.2018, ku ka qenë prezent përfaqësuesi i akuzës Prokurori i Shtetit Ismet Tofaj, i akuzuari B. F., ndërsa nuk ka qenë prezent e dëmtuara, për të cilën gjykata ka provë se është ftuar në mënyrë të rregullt, por mungesën nuk e ka arsyetuar.

Pas leximit të aktakuzës nga Prokurori i Shtetit, ka qëndruar në tërësi pranë aktakuzës, ku i akuzuari ka deklaruar se e ka kuptuar aktakuzën dhe ka pranuar fajësinë për veprën penale për të cilën akuzohet, duke shtuar se ndihet fajtor dhe ndjen keqardhje për rastin që ka ndodhur.

Gjyqtari i vetëm gjykues pasi është bindur se i akuzuari e ka kuptuar aktakuzën, të njëjtit i ka dhënë mundësinë që të pranojë ose të mos e pranojë fajësinë dhe pasi i akuzuari e ka pranuar fajësinë, gjykata e ka njoftuar lidhje me efektet e pranimin të fajësisë. Po ashtu është kërkuar edhe mendimi i Prokurorit të Shtetit lidhur me pranimin e fajësisë nga ana e të akuzuarit, i cili ka deklaruar se është i pajtimit me pranimin e fajësisë.

Andaj nga të lartëcekurat, pasi që janë plotësuar kushtet e parapara sipas dispozitave të nenit 248 par.4 të KPRK-së, për shkak se i akuzuari në fillim të seancës fillestare është deklaruar i fajshëm, në tërësi e ka pranuar veprën penale për të cilën akuzohet, gjykata nuk ka proceduar administrimin e provave.

Gjyqtari i vetëm gjykues, pas pranimit të fajësisë nga i akuzuari, ka gjetur se i njëjti ka kryer veprën penale vjedhja e shërbimeve komunale nga neni 320 të KPRK-së dhe gjendjen e tillë faktike e mori ashtu sikur ishte përcaktuar në aktakuzë dhe provat për të cilat i përmban aktakuza e të cilat janë: Shikimi i procesverbalit mbi konstatimin e gjendjes faktike me nr.0791179 të dt.03.07.2015; fatura mbi dëmin e shkaktuar me nr.DGJ15HP05066 të dt.09.07.2015, të lëshuar nga Sektori i faturimit – KEK – Divizioni i furnizimit në Gjakovë; foto-dokumentacioni, si dhe shkresat e tjera që gjenden në lëndë, gjykata ka ardhur në përfundim se në veprimet e të akuzuarit formohen të githa elementet e veprës penale me të cilën akuzohet, andaj gjykata ka vendosur të njëjtin ta shpallë fajtor dhe ta gjykojë në bazë të ligjit.

Me rastin e caktimit dhe matjes së dënimit gjykata ka marrë parasysh të gjitha rrethanat që ndikojnë në llojin dhe lartësinë e dënimit sipas nenit 73 dhe 74 të Kodit Penal të Republikës së Kosovës, ashtu që si rrethanë lehtësuese ka marrë sjelljen korrekte të të akuzuarit në gjykim, i njëjti është deklaruar i fajshëm, si dhe i vjen keq për rastin që ka ndodhur, ndërsa rrethana veqanërisht rënduese nuk gjeti, andaj të njëjtit ia ka shqiptuar dënimin me kusht, me shpresë dhe bindje se edhe me këtë dënim do të arrihet qëllimi i dënimit të paraparë me dispozitat e nenit 41 të KPRK-së.

Vendimi mbi udhëzimin e të dëmtuarës që kërkesën pasurore – juridike ta realizojë në procedurë të rregullt juridiko civile bazohet në nenin 463 të KPPK-së.

Vendimi mbi shpenzimet e paushallit gjyqësor bazohet në nenin 453 par.1 dhe 2 nënp.2.6 të KPPK-së.

Kurse vendimi për kompensimin e viktimave të krimit u vendos në bazë të nenit 39 të Ligjit nr.05/L-36 për kompensimin e viktimave të krimit.

Nga sa u tha më lartë, e në bazë të nenit 365 të KPPK-së, u vendos si në dispozitiv të këtij aktgjykimi.

GJYKATA THEMELORE GJAKOVË-DEGA NË RAHOVEC
Departamenti i Përgjithshëm - Divizioni Penal
P.nr.414/2016, me datën 30.08.2018

Sekr. Juridike,
Shemsije Shehu

Gjyqtari i vetëm gjykues,
Mizahir Shabani

UDHËZIMI JURIDIK: Kundër këtij aktgjykimi pala e pakënaqur ka të drejtë ankese në afat prej 15 ditësh, nga dita e pranimit të këtij aktgjykimi, Gjykatës së Apelit në Prishtinë, nëpërmjet kësaj gjykate.